
FFORWM CYLLIDEB YSGOLION
Cofnodion o gyfarfod a gynhaliwyd yn Yr Hen Eglwys
Santes Fair, Tremadog,
ar 4 Chwefror 2013 o 2.00 p.m. hyd 5.15 p.m.

Yn Bresennol:

Aelodau Cabinet: Y Cynghorydd Siân Gwenllian (Addysg)
Y Cynghorydd Peredur Jenkins (Adnoddau)

**Cyfarwyddwyr
Corfforaethol:** Mr Dilwyn Williams

Penaethiaid Ysgolion : Mr R Emyr Hughes (Ysgol Dyffryn Nantlle), Mr Alun Llwyd (Ysgol Dyffryn Ogwen), Mr Gwyn Howells (Ysgol y Gelli), Mrs Sianelen Fleming (Ysgol Llanaelhaearn), Mrs Iona Jones (Ysgol Bro Cynfal/Edmwnd Prys), Mrs Esme Spencer (Ysgol Baladeulyn), Mr Dylan Roberts (Ysgol Cymerau).

Llywodraethwyr: Mr Walter Williams (Sector Uwchradd)
Mr Godfrey Northam (Sector Cynradd)
Mr Gwynne Pierce (Sector Cynradd)

Undebau Athrawon: Mr Neil Foden

Yr Esgobaeth: Parchedig Robert Townsend

Swyddogion: Mr Dewi Jones (Pennaeth Addysg)
Mr Hefin Owen (Rheolwr Cyllid Datblygu)
Mr Owen Owens (Uwch Reolwr Addysg)
Mrs Glynda O'Brien (Swyddog Cefnogi Aelodau a Chraffu)

Ymddiheuriadau: Mr Harry Thomas (Prif Weithredwr), Mr Iwan Trefor Jones (Cyfarwyddwr Corfforaethol), Mr Ieuan Roberts (Pennaeth Ysgol Pendalar), Mr Eifion Jones (Ysgol Brynrefail), Mr Vaughan Williams (Ysgol Syr Hugh Owen), Mrs Menna W. Pugh (Ysgol Penybryn, Tywyn), Mr Garem Jackson (Cadeirydd Ffederasiwn Penaethiaid Cynradd Gwynedd).

1. CROESO

Estynnodd y Cadeirydd groeso i Mrs Iona Wyn Jones, Pennaeth Ysgolion Bro Cynfal / Edmwnd Prys, i'w chyfarfod cyntaf o'r Fforwm fel olynnydd i Mrs Gwenan Williams a oedd wedi ymddeol o'i swydd ddiwedd y flwyddyn fel Pennaeth yr ysgolion uchod. Gofynnwyd i'r Swyddog Cefnogi Aelodau a Chraffu anfon gair o ddiolch i Mrs Williams am ei chyfraniad a'i chefnogaeth i'r Fforwm a dymuno'r gorau iddi yn ei hymddeoliad.

2. COFNODION

Llofnododd y Cadeirydd gofnodion cyfarfod o'r Fforwm Cyllideb Ysgolion a gynhaliwyd ar 26 Tachwedd 2012 fel rhai cywir.

3. MATERION YN CODI O'R COFNODION

(a) Eitem 6 (a) – Adolygu Fformiwla Uwchradd

Adroddodd y Rheolwr Cyllid Datblygu bod y Grŵp Adolygu Fformiwla Uwchradd wedi cytuno cyfarfod yn ôl yr angen gan gyfeirio materion i'r Grŵp drwy'r broses Cynllunio Strategol Uwchradd.

Penderfynwyd: Derbyn a nodi'r uchod.

4. CYLLIDEB YSGOLION 2013/14

Cyflwynwyd, er gwybodaeth, adroddiad y Cyfarwyddwr Corfforaethol (DW) yn amlinellu crynodeb o waith ymchwil a wnaethpwyd gan Uned Ymchwil y Cyngor o'r sefyllfa gymharol o ran gwariant ar ysgolion er mwyn bwydo'r broses gyllidol.

Nodwyd bod dau ffactor yn effeithio ar wariant y pen addysg ac yn amrywio ar draws Cymru:

- (a) Dwysedd poblogaeth (ysgolion mewn ardal wledig yn costio mwy)
- (b) Amddifadedd (angen gwario mwy ar blant llai breintiedig)

O safbwynt dwysedd poblogaeth yn y sector cynradd, nodwyd bod Gwynedd y 3ydd isaf yng Nghymru ac yn y 18fed safle o ran amddifadedd ac felly disgwyliar i wariant y pen fod rhwng y 3ydd a'r 18fed safle yng Nghymru.

Tra'n cydnabod bod y gymhariaeth disgybl:athro yn dda yn yr uwchradd, ni ellir dweud ymha safle y dylent fod a nodwyd yr angen i gadw golwg ar y sefyllfa o ystyried rhagolygon gostyngiad demograffig sylweddol o 2014/15 ymlaen. Ychwanegir swm o arian ar gyfer cynhwysiad i'r gyllideb ar gyfer 2013/14 ond eto fe fyddai'n ofynnol cadw golwg ar y sefyllfa ar gyfer ystadegau flwyddyn nesaf a dod i gasgliadau pellach bryd hynny ynglŷn â'r buddsoddiad cymharol.

Yng nghyd-destun yr ysgolion arbennig, nodwyd bod gwahaniaethau sylweddol yn natur a graddfa'r ddarpariaeth a'r ffordd y cofnodir gwariant gan awdurdodau ac felly yn ei wneud yn anoddach i ddod i gasgliad pendant. Nodwyd ymhellach bod cyllid fesul disgybl Gwynedd y 3ydd uchaf drwy Gymru ar sail gros, a'r 8fed ar sail net sydd yn rhoi darlun gwahanol i ystadegau Llywodraeth Cymru sy'n edrych ar y gyllideb ddatganoledig yn unig, ac yn cymharu ar sail nifer llefydd yn hytrach na gwir nifer disgyblion.

Tynnwyd sylw at ddata diweddar sy'n dangos gwahaniaeth o £605 y disgybl rhwng gwariant Cymru a Lloegr ar addysg. Fodd bynnag, ni fydd modd gwneud cymariaethau i'r dyfodol oherwydd newidiadau yn Lloegr i sefydlu academiâu y tu allan i reolaeth awdurdodau lleol.

Penderfynwyd: Derbyn, nodi a diolch am yr adroddiad.

5. CYLLIDO YSGOLION ARBENNIG

Cyflwynwyd adroddiad a gomisiynwyd gan Mr John Roberts ar gyllido ysgolion arbennig sef Ysgol Pendalar ac Ysgol Hafod Lon.

(a) Esboniodd y Pennaeth Addysg mai pwrpas cyflwyno'r adroddiad ydoedd er mwyn i'r Aelod Cabinet Addysg dderbyn barn y Fforwm ar gynnwys yr adroddiad cyn cyflwyno adroddiad terfynol i'r Cabinet ynglyn â dyraniad ariannol ychwanegol i'r ddwy ysgol dan sylw.

Noda awdur yr adroddiad bod peryglon i gymharu gwariant Ysgolion Arbennig oherwydd nad oedd yn bosibl cadarnhau bod y gymhariaeth mewn gwirionedd yn cymharu tebyg wrth debyg o safbwynt gwahanol resymau megis trefniadau anfon disgyblion yn all-sirol, polisïau integreiddio disgyblion mewn ysgolion prif lif, ysgolion arbennig preswyl gan rhai awdurdodau.

Penderfynodd yr awdur ganolbwyntio ar "Gylchlythyr 58/90 gyhoeddwyd yn 1990 gan y Swyddfa Gymreig bryd hynny **"cynnig canllawiau i Awdurdodau lleol ac ysgolion, yn ogystal â chynnig model staffio darluniadol"** h.y.. cynnig sail ar gyfer adnabod y nifer staff sydd ei angen i bob disgybl yn seiliedig ar anawsterau dysgu'r disgybl.

Pwysleisia Cylchlythyr 58/90 **"mae'n dilyn mai mater cymhleth iawn yw asesu anghenion staffio. Ni ddylid cymryd yr ymagwedd a amlinellir yn y cylchlythyr hwn yn gynllun parod, ond yn hytrach fel canllaw bras at ddibenion cynllunio. Mae'r Ysgrifennydd Gwladol yn disgwyl i awdurdodau lleol ac ysgolion barhau i lunio eu barn eu hunain ynghylch anghenion a hynny yng ngoleuni amgylchiadau a blaenoriaethau lleol"**

Ychwanegodd y Pennaeth Addysg nad oedd unrhyw ganllaw arall wedi ei gyhoeddi ers yr arweiniad uchod a'r hyn sydd yn ddyfodiad newydd o safbwynt staffio ers 1990 yw:

- Gofynion Cynllunio, Paratoi ac Asesu (CPA)
- Amser rheoli Pennaeth

I gloi, cyfeiriodd y Pennaeth Addysg at awgrymiadau awdur yr adroddiad sef bod lle i Gyngor Gwynedd ystyried cynyddu ei fuddsoddiad ariannol i'r Ysgolion Arbennig yn bennaf i gynyddu ychydig ar lefelau staffio'r ysgolion gan gyfrifo effaith model staffio darluniadol fel a ganlyn:

- | | |
|--|---------|
| • Cost ychwanegol mabwysiadu model i Ysgol Pendalar | £64,985 |
| • Cost ychwanegol mabwysiadu model i Ysgol Hafod Lon | £66,191 |

Cyfanswm £131,176

(b) Yn ystod y drafodaeth ddilynol ymatebwyd i ymholiadau fel a ganlynol:

- cadarnhaodd y Rheolwr Cyllid Datblygu bod llefydd yn y ddwy ysgol yn cael eu hadolygu'n flynyddol
- yng nghyswllt yr unedau arbennig a leolir yn Ysgol Cymerau a Bontnewydd, nodwyd mai mater rhwng yr Ysgolion Arbennig a'r ysgolion lleol ydoedd trafod y dull ariannu.

- (iii) Siom nad oedd cynrychiolydd o'r Ysgolion Arbennig yn bresennol yn y Fforwm fel bo modd cael eu hadborth ar gynnwys yr adroddiad annibynnol
 - (iv) Sicrhawyd na fyddai'r arian ychwanegol i'r Ysgolion Arbennig yn cael ei dynnu oddi ar yr ysgolion eraill
 - (v) Hyderir y gellir symud ymlaen gyda dyhead y Cyngor i ddiwygio'r ddarpariaeth bresennol yn Ysgol Hafod Lon a chreu canolfan rhagoriaeth Addysg Anghenion Arbennig yn ganolog yn y Sir er mwyn rhesymoli'r ddarpariaeth ar gyfer disgyblion sydd wedi'u lleoli allan o'r Sir ar hyn o bryd.
- (c) Adroddodd yr Aelod Cabinet ei bod wedi derbyn ymddiheuriad gan Benaethiaid yr Ysgolion Arbennig am eu habsenoldeb ond gwneir cais ganddynt i dderbyn adborth o'r hyn a benderfynir gan y Fforwm.

Mewn ymateb, cadarnhaodd y Pennaeth Addysg y byddai'r swyddogion yn rhoi adborth i'r Pensaethiaid fel bo modd iddynt adrodd yn ôl i'r Llywodraethwyr.

Penderfynwyd: (a) Derbyn a nodi cynnwys yr adroddiad annibynnol.

(b) Gofyn i'r Aelod Cabinet gyfleu i'r Cabinet gymeradwyaeth unfrydol y Fforwm i argymhellion awdur yr adroddiad sef i fuddsoddi :

- (i) £64,985 yn ychwanegol i Ysgol Pendalar; a
- (ii) £66,191 yn ychwanegol i Ysgol Hafod Lon.

6. YMGYNGHORI AR SAIL DOSBARTHU ARBEDION TREFNIADAETH YSGOLION

Cyflwynwyd llythyr ymgynghori a anfonwyd i Benaethiaid a Chadeiryddion Llywodraethwyr Ysgolion Cynradd y Sir yn seiliedig ar benderfyniadau'r Cyngor i gau ysgolion yn nalgylchoedd Tywyn a'r Berwyn a'r posibilrwydd o ryddhau £200,000 o'r arbedion sy'n weithredol o 1 Medi 2013 i'r 98 Ysgol Gynradd fydd yng Ngwynedd bryd hynny.

Ymgynghorwyd ar y ddau opsiwn canlynol:

Opsiwn 1

- A Dosbarthu £98,000 trwy ddileu'r llinell "Cynllun Cefnogi Dosbarthiadau Mawr CA2" fydd yn dosbarthu £1,000 i bob ysgol er mwyn dileu'r cyfraniad (Ni fydd hyn yn lleihau'r gyllideb cefnogi dosbarthiadau mawr)**
- B Dosbarthu £102,000 ar sail nifer disgyblion (trwy'r pennawd gwasanaethau a chyflenwadau)**

Opsiwn 2

- A Dosbarthu £98,000 trwy ddileu'r llinell "Cynllun Cefnogi Dosbarthiadau Mawr CA2" fydd yn dosbarthu £1,000 i bob ysgol er mwyn dileu'r cyfraniad (Ni fydd hyn yn lleihau'r gyllideb cefnogi dosbarthiadau mawr)**
- B Dosbarthu £102,000 ar sail nifer disgyblion a deilynga ginio am ddim (trwy'r pennawd Anghenion Dysgu Ychwanegol ac Amddifadedd)**

Derbyniwyd ymateb gan 33 ysgol allan o 102 gyda 14 o blaid Opsiwn 1, 18 o blaid Opsiwn 2 ac 1 yn gwrthwynebu.

Nododd Pennaeth Bro Cynfal/Edmwnd Prys ei bod wedi dychwelyd y ffurflen yn datgan cefnogaeth i Opsiwn 1 ond nad oedd wedi nodi ar y rhestr crynodeb a gyflwynwyd i'r Aelodau yn ystod y cyfarfod. Ychwanegodd y Rheolwr Cyllid Datblygu bod un ffurflen arall wedi cyrraedd yn hwyr a oedd felly yn gwneud cyfanswm o 16 yn ffafrio Opsiwn 1.

Datganodd y Cyfarwyddwr Corfforaethol bod yr ymateb o'r ysgolion yn siomedig ac o'r farn y dylid targedu'r plant nad oedd yn cael 'run cyfle â phlant o gefndiroedd dosbarth canol. Roedd yn gefnogol i Opsiwn 2 ac yr un pryd yn awgrymu comisiynu ymchwil ar faint o arian y dylid ei gyfeirio er mwyn sicrhau swm dyledus i'r trwch o blant sydd ei angen o ystyried hefyd y bydd Grant Amddifadedd yn dirwyn i ben yn y dyfodol.

Pwysleisiodd yr Aelod Cabinet ei bod yn awyddus i weld mwy o adnoddau yn cael ei gyfeirio at ddisgyblion o gefndiroedd difreintiedig er mwyn cau'r bwlch sy'n bodoli o ran cyrhaeddiad ym mherfformiad disgyblion. Drwy gyllido arian ychwanegol tuag at hyn byddai modd gweld pa gynlluniau fyddai'n cau'r bwlch. Hefyd, efallai y dylid defnyddio term mwy cyffredinol megis "plant mewn angen" oherwydd yn aml nid yw plant tlawd yn angenrheidiol yn rhai a ddynodir yn "blant sy'n derbyn cinio am ddim" ond yn hytrach yn grŵp o blant sydd angen cefnogaeth ychwanegol.

Mynegwyd pryderon gan rai Aelodau i weithredu Opsiwn 2 ar sail:

- (a) nad oedd data dangosyddion cinio am ddim yn ddibynadwy
- (b) bod rhai ysgolion gyda balansau sylweddol ac oni fyddai modd eithrio'r ysgolion hynny rhag derbyn dyraniad ychwanegol a chyfarwyddo Penaethiaid i gyflwyno adroddiad ar ddefnydd yr arian ychwanegol.

Mewn ymateb, esboniodd y Rheolwr Cyllid Datblygu ei bod yn ofynnol gweithredu arian datganoledig yn unol â'r ddeddfwriaeth berthnasol ac na fyddai'n bosibl rhoi amod ar ddefnydd yr arian ychwanegol na chyfeirio at falansau.

Yn dilyn pleidlais:

Penderfynwyd: Cymeradwyo Opsiwn 2 ar gyfer dosbarthu'r £200,000 o'r arbedion ym maes ad-drefnu ysgolion yn nalgylchoedd Tywyn a'r Berwyn sy'n weithredol o 1 Medi 2013 i'r 98 ysgol gynradd fydd yng Ngwynedd ar y pryd fel a ganlyn:

- (i) **Dosbarthu £98,000 trwy ddileu'r llinell "Cynllun Cefnogi Dosbarthiadau Mawr CA2" fydd yn dosbarthu £1,000 i bob ysgol er mwyn dileu'r cyfraniad (Ni fydd hyn yn lleihau'r gyllideb cefnogi dosbarthiadau mawr)**
- (ii) **Dosbarthu £102,000 ar sail nifer disgyblion a deilynga ginio am ddim (trwy'r pennawd Anghenion Dysgu Ychwanegol ac Amddifadedd)**

7. ADOLYGIAD O'R FFORMIWLA DYRANNU YSGOLION CYNRADD

Cyflwynwyd adroddiad y Pennaeth Addysg yn deillio o ymgynghoriad ar adolygiad o'r fformiwla dyrannu ysgolion cynradd ac i dderbyn barn ysgolion ar yr egwyddorion a sefydlwyd gan y Grŵp Adolygu Fformiwla Cynradd ar gyfer creu fformiwla dyrannu ddiwygiedig.

Adroddodd y Pennaeth Addysg y derbyniwyd ymateb gan 40 ysgol unigol a chyfeiriwyd at y crynodeb a oedd ynghlwm i'r adroddiad fel Atodiad 1. Gofynnwyd i'r Fforwm ystyried yr ymatebion cyn cyrraedd at farn i'w gyflwyno i'r Aelod Cabinet Addysg.

Ychwanegodd yr Aelod Cabinet Addysg bod Gweithgor o Benaethiaid wedi trafod y fformiwla gyda Mr John Roberts, arbenigwr allanol, ac wedi dod i gonsensws barn bod yr egwyddor i newid y fformiwla dyrannu cynradd yn cael ei dderbyn. Yn anfodus, golygai'r newid yn y fformiwla weld rhai ysgolion yn colli arian tra bo rhai eraill ar eu hennill. Tra'n derbyn y byddai rhai ysgolion yn colli arian, fe fyddai'r arian a ddosbarthir yn sgil arbedion o ganlyniad i ad-drefnu ysgolion cynradd yn lliniaru rhywfaint o'r golled.

Yn ystod y drafodaeth ddilynol amlygwyd y pwyntiau isod gan Benaethiaid unigol:

- (a) siom mai dim ond 40 ysgol sydd wedi ymateb i'r ymgynghoriad
- (b) tra'n cefnogi'r egwyddor o adolygu'r fformiwla, cafwyd enghraifft o un ysgol yn gweld gostyngiad cyllidol o bron i £20,000 a oedd yn ormod o leihad i'w wynebu mewn un flwyddyn ariannol. Pe byddir yn symud at weithredu'r fformiwla arfaethedig, dylid ystyried ei ddiwygio dros gyfnod o ddwy flynedd er mwyn lliniaru unrhyw effaith dros gyfnod hwy.
- (c) Dylid cynnwys penawdau Cymorthyddion a Lwfansau Athrawon ar wahân
- (d) Tra'n derbyn bod y fformiwla arfaethedig yn decach i ysgolion mawr serch hynny nid oes digon o arian yn y pot a bod angen cynyddu gwariant ar addysg
- (e) Nid oedd amser goruchwyliaeth yn ddigonol ar gyfer cyllido awr y dydd trwy'r flwyddyn
- (f) Diffyg pennawd ar gyfer gofynion y Cyfnod Sylfaen

Penderfynwyd: (a) Derbyn a nodi cynnwys yr adroddiad.

(b) Cyflwyno i'r Aelod Cabinet:

- (i) cymeradwyaeth y Fforwm Cyllideb Ysgolion i'r egwyddor o'r adolygiad fformiwla dyrannu ysgolion cynradd gan gymryd i ystyriaeth y sylwadau amlinellir uchod**
- (ii) cefnogaeth i symud ymlaen i'w weithredu dros gyfnod o ddwy flynedd.**

8. BALANSAU YSGOLION

Cyflwynwyd llythyr anfonwyd i Benaethiaid a Chadeiryddion Llywodraethwyr holl ysgolion Gwynedd ynglyn â defnydd o falansau.

Atgoffwyd yr Aelodau o'r ddeddfwriaeth lle mae gan yr awdurdod hawl i gyfarwyddo'r corff llywodraethol ynghylch sut i wario'r gweddill ym mantolen yr ysgol ar gyfer cyfnod cyllido, os:

- (i) yn achos ysgol gynradd bod y gweddill yn £50,000 neu'n uwch, ac
- (ii) yn achos ysgol uwchradd neu ysgol arbennig bod y gweddill yn £100,000 neu'n uwch;

a bod y Fforwm wedi penderfynu ychwanegu'r cymal isod:

- (a) yn achos ysgol gynradd, lle bo'r gweddill yn fwy nag 8% o gyfran cyllideb yr ysgol neu £50,000 neu fwy, prun bynnag yw'r mwyaf . . . “

- (b) yn achos ysgol uwchradd, lle bo'r gweddill yn fwy na 8% o gyfran cyllideb yr ysgol neu £100,000 neu fwy, prun bynnag yw'r mwyaf"

Cyfeiriodd y Pennaeth Addysg at y drafodaeth a'r sylwadau wnaed yng nghyfarfod diwethaf y Fforwm ac yn deillio o'r cofnod bu iddo ymgynghori ynglŷn â dymuniad y Fforwm i ystyried diddymu'r trothwy 8%.

Cyflwynwyd i'r Fforwm yn ystod y cyfarfod taflen yn nodi rhai ymatebion a dderbyniwyd gan ysgolion (14 cynradd a 4 uwchradd) ac fe nodwyd o'r rhai a ymatebwyd bod 8 ysgol yn fodlon i ddiddymu'r 8% a 7 ysgol yn dymuno cadw'r cymal 8%.

Tywysodd y Rheolwr Cyllid Datblygu'r Aelodau drwy'r rhestr o falansau'r holl ysgolion gan dynnu sylw at amcangyfrif bras a gwblhawyd gan yr Uned Gyllid Datblygu ar gyfer 31.03.13.. Esboniwyd y byddai modd cael gwell darlun erbyn mis Mehefin gan fod ysgolion wedi clustnodi defnydd o'r balansau i osod cyllideb ar gyfer 2012/13 ac o bosib erbyn hynny wedi gweithredu ar gynlluniau hyfyw i wario'r balansau.

Nododd Bennaeth ei fod yn gefnogol i gadw'r cymal 8% neu £50,000 (yn achos ysgol gynradd) a £100,000 (yn achos ysgol uwchradd ac arbennig) prun bynnag yw'r lleiaf.

Amlygodd sawl Pennaeth bryder ynglŷn â'r ysgolion hynny sydd gyda balansau sylweddol ac yn rhan o gynllun gwarchodaeth gan yr awdurdod oherwydd niferoedd isel y disgyblion. Teimlwyd nad oedd modd i ysgolion bach fedru buddsoddi mewn staff a'i fod yn sialens i'r Pennaethiaid fedru gwario gweddill y balansau. Gwelir bod yr un ysgolion yn cario balansau flwyddyn ar ôl blwyddyn. Ychwanegwyd oni ddylai'r mater gael ystyriaeth fel rhan o'r broses hunan arfarnu Pennaethiaid.

Awgrymwyd a fyddai modd i swyddogion wirio'r polisi gwarchodaeth fel bo modd rhoi ystyriaeth ddwys i ddiddymu'r elfen gwarchodaeth i'r ysgolion hynny sydd â balansau sylweddol a'u bod felly yn hunan gyllido drwy ddefnyddio balansau.

Penderfynwyd: Parhau gyda'r polisi presennol ar hyn o bryd ac adolygu'r sefyllfa ynglŷn â diddymu'r cymal 8% yng nghyfarfod nesaf y Fforwm ar 25 Mehefin 2013 oherwydd gellir cael gwell darlun o effaith y polisi erbyn hynny.

9. CYTUNDEB LEFEL GWASANAETH EIDDO

Cyflwynwyd (i) Cytundeb Lefel Gwasanaeth Cynnal a Chadw Adeiladau ar gyfer Ysgolion Cynradd

(ii) I'r Aelodau yn ystod y cyfarfod, Cytundeb Lefel Gwasanaeth Cynnal a Chadw Adeiladau ar gyfer Ysgolion Uwchradd Ebrill 2013 – Mawrth 2016

(A) Cytundeb Lefel Gwasanaeth Cynnal a Chadw Adeiladau Ysgolion Cynradd

Tywysodd yr Uwch Reolwr Addysg yr Aelodau drwy'r adroddiad ynghylch Cytundeb Lefel Gwasanaeth y sector cynradd gan nodi bod pwyntiau 3, 4 a 5 yn cyfarch anfodlonrwydd ysgolion gyda'r Cytundeb Lefel Gwasanaeth blaenorol. Roedd o'r farn bod y Cytundeb yn fwy syml gyda thabl un tudalen wedi cymryd lle rhestr hirfaith. Cyfeiriwyd at y newid o ran cyfrifoldebau sef bod y Cyngor bellach yn cymryd cyfrifoldeb dros gyllido gwaredu asbestos o loriau pan fo ysgolion yn dymuno gosod loriau newydd.

Yn ystod y drafodaeth ddilynol amlygwyd y pwyntiau canlynol:

(a) synnwyd bod ysgolion yn gyfrifol am ffensys, waliau a giatiau a phryderwyd pe byddai gan ysgolion ddim arian ar gyfer eu hatgyweirio beth fyddai'n digwydd o safbwynt iechyd a diogelwch y disgyblion.

Mewn ymateb, esboniodd yr Uwch Reolwr Addysg petai yn fater brys ac argyfyngus byddai'n rhaid cytuno ar delerau. Fodd bynnag dylid eu cynnal a'u cadw i gyflwr derbyniol yn y lle cyntaf fel nad ydynt yn dirywio mewn cyflwr.

(b) gofynnwyd be' fyddai'n digwydd mewn sefyllfaoedd o lifogydd yn dinistrio ffensys / waliau a dŵr yn mynd drwy'r ysgol.

Eglurodd y Cyfarwyddwr Corfforaethol y byddai yswiriant yn cyfarch sefyllfaoedd tebyg i'r uchod.

Penderfynwyd: Derbyn y Cytundeb Lefel Gwasanaeth Cynnal a Chadw Adeiladau ar gyfer Ysgolion Cynradd Ebrill 2013 – Mawrth 2016.

(B) Cytundeb Lefel Gwasanaeth Cynnal a Chadw Adeiladau Ysgolion Uwchradd

Tywysodd yr Uwch Reolwr Addysg yr Aelodau drwy'r Cytundeb gan dynnu sylw at y rhestr ynghlwm i'r Cytundeb fel Atodiad B a nodi mai'r ysgolion sydd yn gyfrifoldeb am unrhyw fater nad yw wedi ei nodi ar y rhestr honno.

Mynegodd Bennaeth ei anfodlonrwydd i dderbyn y Cytundeb oherwydd nad oedd wedi cael amser i roi sylw teilwng i'w chynnwys gan mai newydd ei derbyn ydoedd ac awgrymwyd y dylid gohirio ystyried y ddogfen tan y cyfarfod nesaf ym mis Mehefin. Roedd Is-grŵp o Benaethiaid wedi trafod egwyddorion y gytundeb ond byddai'n rhaid cael trafodaeth bellach ar faterion megis gwaith uwchben y trothwy ariannol a phwy sy'n gyfrifol am y gost. A fyddai'n golygu bod Penaethiaid yn gorfod anfon am dri phris gan gontractwyr sy'n golygu byrdwn gweinyddol biwrocraidd?

Gofynnodd y Cyfarwyddwr Corfforaethol pam bod angen dogfen o gwbl ac oni fyddai trefn o ddatganoli'r arian ac ymddiried yn yr awdurdod i ymdrin â chyfrifoldebau cynnal a chadw yn fwy effeithiol. Roedd o'r farn bod y gyfundrefn uchod yn creu gwastraff ar amser Penaethiaid a staff drwy orfod trafod pwy sy'n gyfrifol am wahanol agweddau o'r gwaith cynnal a chadw.

Penderfynwyd: Gohirio cymryd penderfyniad ynglyn â'r Cytundeb Lefel Gwasanaeth Cynnal a Chadw Adeiladau Ysgolion Uwchradd a'i gyflwyno ymhellach i gyfarfod nesaf y Fforwm ar 25 Mehefin 2013 er mwyn i Benaethiaid fedru rhoi sylw teilwng i'w chynnwys.

10. CYTUNDEB LEFEL GWASANAETH GEGYR (Gwasanaeth Effeithiolrwydd a Gwella Ysgolion Rhanbarthol Gogledd Cymru)

Cyfeiriodd y Pennaeth Addysg at y Cytundeb Lefel Gwasanaeth uchod sydd yn gytundeb i'r 6 awdurdod (Gwynedd, Ynys Môn, Conwy, Dinbych, Fflint a Wrecsam) a bod trafodaeth yn mynd rhagddi a hynny'n seiliedig ar ddeall beth mae'r gwasanaeth gwella ysgolion yn ei gynnig. Fodd bynnag roedd trafodaeth wedi bod ychydig yn rhwystredig oherwydd diffyg penodiad Prif Swyddog i'r GEGYR.

Nodwyd bod y Cytundeb Lefel Gwasanaeth rhwng yr awdurdod a GEGYR yn seiliedig ar achos busnes llawn a gyflwynwyd i Gabinet y 6 awdurdod.

Esboniwyd strwythur y GEGYR sef tîm o 30 Arweinyddion Sustem dan ofal y Prif Swyddog a 3 Uwch Arweinydd Sustem, un yn gyfrifol am Môn/Gwynedd, un ar gyfer Dinbych/Conwy ac un i Fflint/Wrecsam. O dan bob 3 Uwch Arweinydd Sustem ceir 3 Is-Dîm a fydd yn cyflawni'r prif ddyletswyddau ac fe ddyrannir 6 diwrnod i ysgolion fydd yn cynnwys 3 ymweliad gydag ymweliadau a chymorth ychwanegol yn ôl yr angen. Fe fyddir yn ymgynghori'n llawn ar y cynllun busnes rhwng 'rŵan a 1 Ebrill 2013.

Cynigwyd y 4 pwynt isod i'w hystyried fel ffordd ymlaen ar sail y sefyllfa uchod:

1. Gweithredu'n hollol dryloyw hefo ysgolion ac yn cynnig yr un lefel cytundeb gwasanaeth a drafodir gyda'r GEGYR.
2. Bod yr awdurdod a'r ysgolion yn derbyn mai'r Cytundeb Lefel Gwasanaeth yma fydd yn weithredol ar gyfer 2013/14 a gofynnir am gyfraniad o gyllidebau ysgolion ar yr un sail ac egwyddor â Chytundeb eleni a'r gorffennol gyda Chwmni CYNNAL.
3. Ffurfio Is-grŵp o Benaethiaid Cynradd, Uwchradd ac Arbennig i fanylu ar natur y Cytundeb Lefel Gwasanaeth yn ystod 2013/14.
4. Byddir yn anfon gwybodaeth at Benaethiaid o'r holl drefniadau gweinyddol ategol arferai CYNNAL drefnu i ysgolion. Fe fyddai'n rhaid i'r awdurdod gyflenwi'r elfennau hyn drwy grantiau.

Amlygwyd nerfusrwydd ymysg Penaethiaid ynglyn â sefydlu'r uchod gan nodi pryder ynglyn â threfniadau hawl a haeddiant, trafodaethau ar y pynciau sylfaen, datblygiad proffesiynol parhaus, a gwahaniaethau yn yr awdurdodau ar draws y Gogledd.

Mewn ymateb i liniaru pryderon y Penaethiaid, sicraodd y Pennaeth Addysg:

- (a) Y byddai'r Is-grŵp o Benaethiaid a benodir yn manylu ar y Cytundeb Lefel Gwasanaeth ac yn gallu adnabod yr elfennau priodol i'w prynu / neu ddim ar gyfer llunio Cytundeb Lefel Gwasanaeth 2014/15.
- (b) Lle bynnag y bydd angen yn cael ei adnabod mewn ysgolion yn naturiol fe fyddai'n rhaid targedu mwy
- (c) Byddai Hyfforddiant Mewn Swydd yn parhau i fodoli ac fe fyddai'r cyfleoedd ar gael ond ddim i raddfa Hawl a Haeddiant
- (d) Y byddir yn cadw at yr un patrwm ac ar sail yr un cyllid a weithredwyd y llynedd

Penderfynwyd: Cymeradwyo i'r Pennaeth Addysg symud ymlaen fel amlinellir yn 1 – 4 uchod.

10. GRANT EFFEITHIOLRWYDD YSGOLION A'R GRANT AMDDIFADEDD DISGYBLION

Adroddodd y Pennaeth Addysg bod twf yn y Grant Effeithiolrwydd Ysgolion ar lefel cenedlaethol o £32.5m i £37.5m gyda thwf yn y dyraniad gros i Wynedd o £1.4m i £1.6m a olygai gynnydd o £200,000. Rhagwelir twf pellach yn y grant ar gyfer 2014/15. Gwneir cais am y grant ar sail ranbarthol fel rhan o gais y 6 awdurdod.

Fe fyddir yn targedu'r Grant Amddifadedd Disgyblion yn uniongyrchol.

Penderfynwyd: Derbyna a nodi'r wybodaeth uchod.

11. DYDDIAD Y CYFARFOD NESAF

Adroddwyd y cynhelir y cyfarfod nesaf ar fore Mawrth, 25 Mehefin 2013 am 9.00 hyd 12.00 o'r gloch yn Hen Eglwys y Santes Fair, Tremadog.

Penderfynwyd: Derbyn a nodi'r uchod.

CADEIRYDD